

No Luena

Pakpakat ta Pol tupas ira

TESALONAIKA

Pol ga so no lotu kenas Tesalonaika tano hanuo Masedonia. Pol ga manga sip ira Tesalonaika ma ga mur ira tahut na magingin sen mon ing ga lon nalamina diet (nes 1 Tes. 2.1-12). Iesen a tamat na hinelar ga haan tupas no lotu kaia ma ira Kristian diet ga hagut Pol bia na hilau laah, kabi hiruo (Apostolo 17.1-10). Io, Pol ga haan urau Beria ma namur urau Aten. Ma ga tule Timoti mekaia Aten aras Tesalonaika (1 Tes. 3.1-5) kanong ga manga ngarngarau uta ira Kristian aras Tesalonaika nalamina ta ira haraubaal (2.13-3.10). Namur um Pol ga haan urau Korin ma bia Timoti ga tapukus gaam hinawase Pol tano nurnuruan ma no harmarsai ta ira Tesalonaika (3.6), io, Pol ga tule iakan ra pakpakat tupas diet wara harharagat diet ma wara hauhausur diet ta ira bilai na tintalen (4.1-12; 5.12-22). Pol ga hausur mah diet tano taptapukus ta Kraisa ma no tuntunut hut sukun ra minaat ta ira Kristian kanong Pol ga haan sukun hagasiaan diet ma diet pa ga palai harsakit ta kaiken ra linge (1.9; 4.13-5.11). Kaiken ira linge tano hauhawatine ta ira pakana bung a tamat na linge ta ira iruo pakpakat ta Pol tupas ira Tesalonaika (nes mah 2 Tes. 2.1-12).

1 ¹Iau Pol tika ma Sailas ma Timoti, metal tule ken ra nianga tupas muat ira matanaiabar na lotu kaia Tesalonaika, ing muat gar ta God no adahat Sus ma tano Watong Jisas Kraisa.

A harmarsai ma ra malum na kis ta muat.

Pol ga tanga tahut tupas God uta ira udiet nurnuruan ira Tesalonaika.

²⁻³Metal la tangtanga tahut ta God uta muat bakut ing metal kilkilam muat narako ta ira numetal sinasaring, kanong metal la liklik leh ira numuat gingilaan ra matmataan tano udahat God, no adahat Sus. Metal lik leh ira numuat pinapalim ing i tahuat ta ira numuat nurnuruan. Ma metal lik leh ira numuat dadas na pinapalim ing i hanuat meram narako ta ira numuat harmarsai. Metal lik leh mah ira numuat nanaho ma ra

nurnuruan tano udahat Watong Jisas Krai, kaik muat gi la turtur dadas ta ira numuat ngunngutaan. ⁴Io, muat ira harahinsakaan narako ta Krai ing God i manga sip muat, metal tanga tahut tupas God huo kanong metal nunure bia i te gilamis muat. ⁵Ma metal nunure huo kanong ira numetal hinarpir ma no tahut na hinhinawas pa ga haan tupas muat ma ra nianga mon. Taie. Ga haan tupas muat tika ma ra dadas ma tika ma no Halhaliana Tanuo. Ma muat ga nes bia metal ga manga nurnur bia ira numetal harpir i tutun. Muat nurnur bia iakan i tutun kanong muat nunure metal, bia a mangana tunotuno hohe metal ing metal ga lon nalamina ta muat. Ga palai ta muat bia metal ga lon wara gaie muat. ⁶Ma muat ga mur timaan ira numetal nilon ma no Watong mah hoken: nalamina ta ira but na ngunngutaan muat ga bale leh no hinhinawas ma ra kanakana, iakano kanakana nong no Halhaliana Tanuo ga tar ie ta muat. ⁷Io kaik, muat ga hanuat hoing tiga bilai na malalar nong ira ut na nurnuruan kenas Masedonia ma Akaia diet naga mur. ⁸⁻¹⁰Ma metal palai ta iakan kanong no hinhinawas utano Watong pai hanahaan mekaia ho muat uras Masedonia ma Akaia sen mon. Taie. No hinhinawas uta ira numuat nurnuruan ta God i te haan ta ira subaan bakut. Io kaik, metal pai supi bia metal na tange habaling tiga linge kanong diet at ta kaie ra subaan diet la hinhinawas utano pakana bung bia metal ga haan ukaia ho muat ma muat ga bale leh metal. Diet hinhinawas bia muat ga tahurus sukun ira palimpuo hohe, muat gaam haan tupas God wara tartaram no God tutun, no lilon, ma wara kiskis kawase no Natine meram ra mawe nong i ga hatut ie sukun ra minaat. Ma no Natine, ne Jisas, nong na halangalanga dahat sukun ra ngalngaluan nong God na tar ie namur.

**Pol ga halilik ira Tesalonaika utano uno
mangana nilon nalamina ta diet.**

2 ¹Io, ira hinsaka metal ta Krai, muat nunure bia no numetal hinahaan ukaia ho muat pa ga linge bia. A mon hunena. ²Muat nunure bia di gate luena hangungut metal aras Pilipai, ma diet pa ga hirhir ta dahin wara gilgil huo. Ma ing metal ga haan tupas muat God ga habalaraan metal wara tangtange no uno tahut na hinhinawas ta muat. Ma ga habalaraan metal huo nalamina ta diet ing diet ga manga sukuane metal. ³Ma metal ga balaraan huo ing metal ga haragat muat wara nurnur kanong ira numetal harharagat pa ga tahuat meram narako ta ira sakana lilik. Metal pa ga sip wara lamlamus habato muat ta ira linge pai tutun ma ta ira sakana magingin. Taie. Ma ing metal ga harpir metal pa ga walar wara hinasakit ta muat bia muat na nurnur. ⁴Iesen metal harharpir ma no tahut na hinhinawas haruat tano sinisip ta God. Ma i tale bia metal na harpir huo kanong God i te nes kilam metal bia metal haruat wara hinarpir ma no tahut na hinhinawas, kaik gaam tar

ie ta metal. Ma ing bia metal harpir, metal pai walar wara haguama ira tunotuno. Taie. Metal walar wara haguama God nong i la nesnes narakoman ta ira bala metal. ⁵Io, muat nunure bia metal pa ga pirlat muat wara gaiena tiga linge ma metal pa ga hanuat ho ira ut na silha kinewa ing diet suhe ira udiet sakana sinisip. God i tale bia na suro haut kaiken uta metal. ⁶Ma metal pa ga sip mah bia muat bia ari a mes na tunotuno na pirlat metal. Iesen gor tale metal bia metal na tange hadadas ta muat bia muat na taram. Ma gor tale bia metal na gil huo kanong metal ira apostolo ta Krai. ⁷Iesen metal ga matien na tunotuno nalamin ta muat, hoing tiga makai i la balbalaure timaan ira natine. ⁸Io, metal ga so ira kati metal ta muat huo, kaik metal ga guama wara tamtabar muat ma no tahut na hinhinawas. Iesen pai iakano sen mon. Taie. Metal ga guama mah wara tamtabar muat ma ira numetal nilon kanong metal ga manga sip muat. ⁹Ira hinsaka metal, metal nunure bia muat lik leh ira numetal gingilaan nalamin ta muat bia metal ga pirpir muat ma no tahut na hinhinawas ta God. Ira kaba bungbung, ra kasakes bia ra bung, metal git manga papalim uta ira ametal nian ma pane mah ira numetal mes na sunupi. Ma metal git kilkingane ra ngunungut ta kaike ra pinapalim waing metal pa na kap tar ra tinirih ta tiga nong.

¹⁰I tale muat bia muat na suro haut ira numetal mangana nilon nalamin ta muat ira ut na nurnuruan. Ma God mah i tale bia na suro haut huo. Metal git murmur ira gamgamatien na magingin, metal git gilgil ira takodas, ma pa ga tale tikai wara kilkilam metal bia metal ga gil tiga sakena. ¹¹⁻¹²Ma muat nunure bia metal ga harahut muat hoing ira sus anari i la harharahut ira nati diet. Metal git hamhabalaraan ma harharagat muat bia muat na lon haruat tano sinisip ta God nong i la taatau muat uram tano uno kinkinis na harkurai ma ra harbalaurai ma tano minarine.

**Pol ga tanga tahut tupas God uta ira Tesalonaika
kanong diet ga bale leh no nianga ta God.**

¹³Ma metal la tangtanga tahut mah ta God kanong bia muat ga hatur kawase ira nianga ta God ing muat ga hadade leh ta metal, muat ga bale leh ie. Muat pa ga lik bia a nianga gar na tunotuno mon. Taie. Muat ga bale leh ie hoing ra nianga ta God. Ma tutun sakit, a nianga ta God iakano, nong i papalim narako ta muat ira ut na nurnuruan. ¹⁴Ira hinsaka metal, i palai bia no nianga ta God i papalim huo narako ta muat kanong ira mangana ngunngutaan ga haan tupas muat i haruat ma ing ga haan tupas ira matanaibar ta Krai Jisas ing diet lotu tupas God ta ira udiet hala na lotu aram Iudeia. Ira tunotuno tano numuat hanuo diet ga helar ta muat hoing ira Iudeia diet ga helar ta ira matanaibar na lotu aram Iudeia. ¹⁵⁻¹⁶Ma kaike ra Iudeia diet ga bu bing no Watong

Jisas ma ira tangesot, ma diet ga tule isisai mah ta metal. Diet walwalar wara turtur bat metal bia metal pa na tange no tahut na hinhinawas ta diet ing diet pai Iudeia ma diet kabi kap no nilon. Ma ing diet walar wara turtur bat metal huo diet pai haguama God. Taie. Diet malentakuane ira tunotuno bakut. Ma ing bia diet gil huo diet te gil haruatne ira kaba magingin sakena ing diet la hung taar me. Iesen no ngalngaluan ta God i te manga haan tupas um diet.

**Bia Pol ga manga ngarngarau uta ira nurnuruan ta
ira Tesalonaika ga tule Timoti ukaia ho diet.**

¹⁷Io, ma bar hinsaka metal, ing di ga sunang metal wara hanhan sukun muat metal ga manga supi muat ing bia metal te haan talur muat a bar bung mon nalua. Tutun, metal ga haan sukun muat, iesen ira numetal lilik i kis taar ma muat. Io, metal ga manga walar at bia metal na nes habaling muat. ¹⁸Metal ga sip bia metal na tapukus balin ukatiga ho muat. Ma iau, Pol, iau ga walar ari pakaan bia ni tapukus ukaia. Iesen Sataan ga tur bat metal. ¹⁹Io, metal ga wara taptapukus ukaia kanong bia Jisas no udahat Watong na hanuat ma dahat na tur ra matmatahan tana, io, muat at, muat no burena bia metal na balaraan, bia metal na kap ra gungunuama, ma bia metal na laatlaat. ²⁰Tutun sakit, muat no minari metal ma no numetal gungunuama.

3 ¹Io kaik, bia metal ga manga ngarngarau uta muat ma sen pa ga tale bia metal na nes muat, io, mir ga lik bia i tahut bia mir na kis baal baak kaia Aten. ²⁻³Ma mir ga tule Timoti, no tasi dahat nong i papalim tika ma mir wara gaiena no tahut na hinhinawas gar ta Krai. Ma mir ga tulei bia na habalaraan muat ma bia na haragat muat ta ira numuat nurnuruan, bia tikai ta muat kabi manga ngarngarau uta kaiken ra harhangunngutaan. Muat at, muat palai bia ken ra harabaal tupas dahat mekaia ho no sinisip gar ta God. ⁴Ma muat palai ta iakan kanong bia metal ga kis tika taar ma muat, metal git huna hinhinawase muat bia dahat na haan taar ta kaike ra harhangunngutaan. Kaiken muat te nunure bia i te hanuat um. ⁵Io kaik, bia iau ga manga ngarngarau uta muat ma sen pa ga tale bia ni nes muat, io, iau ga tule Timoti ukaia ho muat bia nigi palai uta ira numuat nurnuruan. Ma iau ga tulei kanong iau ga burut bia no ut na harwalaam gor te walaam dak muat ma ira numetal pinapalim naga linge bia.

**Pol ga balaraan ing ga hadade bia ira Tesalonaika
diet ga tur dadas ta ira udiet nurnuruan.**

⁶Io, kaiken mon Timoti i te tapukus ukai ho mir. Ma i te kap hawaat ra bilai na hinhinawas uta ira numuat nurnuruan ma ira numuat harmarsai. Ma i hinawase mah mir bia muat la liklik leh ira bilai na linge uta metal,

ma bia muat manga sip bia muat na nes metal hoing metal mah ukatiga ho muat. ⁷Io kaik, bar hinsaka metal ta Kraiss, ing bia mir ga hadade uta ira numuat nurnuruan, iakano nianga ga habalaraan mir uta muat nalamin ta ira numetal kaba tinirih ma harhangunngutaan. ⁸Io kaik, kaiken metal lon timaan kanong muat tur dadas tano Watong. ⁹Io, bia metal tanga tahut ta God wara gaie muat, pa na haruat tun at tano gungunuama metal kilingane uta muat ra matmataan ta God. ¹⁰Ira kaba bungbung, ra kasakes ma ra bung, metal la saasaring tutun bia metal na nes habaling muat, ma bia metal naga harahut muat ta ira numuat nat na sunupi ta ira numuat nurnuruan.

**Pol ga sasaring bia God na hadadas ira
Tesalonaika ta ira bilai na magingin.**

¹¹Io, ma metal sasaring bia God nadahat Sus ma ne Jisas no udahat Watong na tagure tar no numetal ngaas ukaia ho muat. ¹²Ma metal sasaring bia no Watong na manga hatahuat ira numuat harmarsai hargilaas ta muat ira ut na nurnuruan ma ta ira mes mah. Metal sasaring bia ira numuat harmarsai na manga tamat hoing ira numetal ukaia ho muat. ¹³Ma metal sasaring huo waing God na hatumarang muat bia tikai pa na tale bia na kilam muat bia muat te gil ra sakena ma sen bia muat na gamgamatien ra matmataan ta God nadahat Sus tano pakana bung bia Jisas no udahat Watong na hanuat tika ma ira uno kaba halhaliana.

Da lon wara haguama God.

4 ¹Bar hinsaka metal ta Kraiss, wara hapataam ira nianga metal wara tangtange hoken ta muat: metal ga hausur muat bia muat na lon hohe wara haguama God. Ma tutun, muat la lalon huo. Ma sen metal saring muat ma metal haragat muat tano hinsane Jisas no udahat Watong bia muat na tahuat hakakari ta ira numuat bilai na nilon. ²Ma na tahut bia muat na lon huo kanong muat palai taar ta ira dadas na nianga metal ga tar ta muat tano hinsana no Watong Jisas. ³God i sip bia muat na halhaal ta ira sakena taar ta ira gamgamatien. Io, i sip bia muat na tur pas no sakana magingin na ninahon tika. ⁴I sip bia titatikai na palai hohe wara balbalaure timaan no palatamaine at haruat ta ira gamgamatien na magingin ma ira magingin i takodas ta ira ninaas ta ira tunotuno. ⁵Ma i sip mah bia muat pa na mur ira sakana masingan hoing diet ira tabuna nurnuruan ing diet pai nunure God diet la gilgil. ⁶Ma waak tiga nong i noh tika ma tiga hahin gar na mes ma na gil ronga tano tasine huo. Waak i habato leh no tasine huo kanong no Watong nong na balu pukus ma ra harpidanau ta kaiken ra mangana linge, kaik huo metal gom huna hakatom hadadas muat. ⁷Na tahut bia muat na lon huo kanong God pai le tatau dahat wara gilgil ira bilingana magingin, iesen

bia dahat na halhaal ta ira sakena taar ta ira gamgamatien. ⁸Io kaik, sige tikai i malok ise iakan ra nianga, pai malok ise tiga tunotuno. Taie. I malok ise God nong i tar no uno Halhaliana Tanuo ta muat.

⁹Ma metal pai supi bia metal na pakpakat taar ta muat bia muat na harmarsai hargilaas taar nalamina ta muat ira harahinsakaan ta Kraisa kanong God i hausur muat at bia muat na harmarsai harbasia ta muat. ¹⁰Tutun sakit muat la gilgil huo harbasia ta muat ira harahinsakaan kaia Masedonia. Iesen bar hinsaka metal, metal haragat muat bia muat na tahuat hakakari ta ira numuat harmarsai. ¹¹Ma metal haragat mah muat bia muat na lon haruat ta ira dadas na nianga metal ga tar ta muat hoken: muat na bul hadadas ira numuat lilik bia muat pa na hamalasma tiga nong ma bia muat pa na song leh ira pinapalim gar na mes. Na tahuat bia muat na papalim tus laah ma ra lima muat. ¹²Muat na gilgil huo waing diet ing diet pai nurnur diet na ru muat ma bia muat pa naga lon mur tikai bia na banot ira numuat sunupi.

No watong na tapukus hohe.

¹³Io, bar hinsaka metal ta Kraisa, metal sip bia muat na palai uta diet ing diet te maat, kaik muat kabi tapunuk hoing diet ira mes ing diet pai kis kawase no nilon namur ma ra nurnuruan. ¹⁴Dahat nurnur bia Jisaga ga maat ma ga tut hut balin. Io kaik, God na lamus tikane ma Jisaga diet ing diet te maat ma ra nurnuruan tana. ¹⁵Kaiken metal hauhausur muat ine, a harausur tano Watong, ma i hoken: dahat ing dahat lon baak ing no Watong na hanuat, io, dahat pa na lua ta diet ing diet te maat. ¹⁶Io, da hadade ra tamat na kunup ma no ingana no tamat ta ira angelo ma no kinakel tano tahuat ta God, ma no Watong at na hausur meram ra mawe. Diet ing diet te maat ma ra nurnuruan ta Kraisa diet na huna tut hut. ¹⁷Io, dahat um ing dahat lon baak, God na kap haut dahat tika ma diet narakoman ra bahuto wara harsomane no Watong aram ra mauho. Kaik, dahat naga kis hatika ma no Watong. ¹⁸Io kaik, muat na habalaraan harbasiane muat ma kaiken ra nianga.

Da taguro timaan tano hinanuat tano Watong.

5 ¹⁻²Io, bar hinsaka metal ta Kraisa, muat pai supi bia metal na pakat ta nianga ukaia ho muat utano pakana bung ing kaiken ra linge na hanuat kanong muat at muat nunure timaan tar bia no pakana bung tano Watong na hanuat hoing no hinanuat ta tiga ut na kikinau ra bung. ³Ira matanaibar diet na tange bia, “Dahat pa na burte ta tiga linge. A malum i kis taar ta dahat.” Io, ta iakano pakana bung at a but na halhaliarai na haan tupas diet hoing ira harpaas na bulu ing bia tiga hahin i wara kinakaha. Ma taie ta nong pa na hilau. ⁴Ma muat ira hinsaka metal, iakan ra bung pa na hakarup muat hoing tiga ut na kikinau kanong muat

pai nat na kankado. ⁵Taie. Muat bakut, muat lon tano palai ra kasakes. Dahat pai lon tano kankado ra bung. ⁶Io kaik, waak dahat kubaba hoing diet tari. Na tahut bia dahat na hangala ma dahat na taguro ma ra palai na lilik hoing diet ing diet pai mom. ⁷Diet ing diet kubaba, diet la kumkubaba ra bung. Ma ira ut na minom, diet la mamom ra bung. ⁸⁻¹⁰Iesen dahat, dahat ira tunotuno gar na madaraas. Io kaik, waak dahat haruat hoira ut na minom. Dahat na taguro timaan. Hoing ira umri, dahat na sigam no udahat nurnuruan ma no udahat harmarsai hargilaas hoing tiga sigasigam na pala riam. Ma hoing ira umri mah, dahat na kuhe no udahat nurnuruan kawase no harhalon kanong God pai le bul no uno lilik bia no uno ngalngaluan na haan tupas dahat. Taie. I sip bia na halon dahat tano udahat Watong Jisas Kraiis nong ga maat wara gaie dahat. Ma ga maat wara gaie dahat waing dahat na lon tika mei. Taie ta linge bia dahat lon taar bia dahat te maat. Dahat na lon tika mei. ¹¹Io kaik, muat na habalaraan ma haragat harbasiane muat hoing muat la gilgil.

Da mur ira bilai na magingin.

¹²Io, bar hinsaka metal ta Kraiis, metal saring muat bia muat na urur ta diet ing diet manga papalim nalamina ta muat. Diet balaure muat ta ira numuat nilon tano Watong. Ma diet pir muat mah. ¹³Na tahut bia muat na manga lik hatamat diet ma bia muat na marse diet uta ira pinapalim diet gil. Muat na harbalaan hargilaas.

¹⁴Bar hinsaka metal, metal haragat muat bia muat na hakatom ira malmalungana, ma muat na habalaraan diet ira ut na nginarau, ma muat na harahut diet ing diet pai tur dadas, ma bia muat pa na manga gasien wara hapidanau tiga nong. ¹⁵Muat na harbalaurai timaan bia waak muat balu ra sakena ma ra sakena baling. Iesen muat na walar hatikane wara gilgil ra tahut harbasia ta muat ma diet ira mes mah.

¹⁶I tahut bia muat na guama hathatika. ¹⁷Muat na sasaring hait. ¹⁸Muat na tanga tahut uram ho God ta ira linge bakut. Warah, kanong God i sip bia muat ing muat kis taar ta Kraiis, muat na lon huo.

¹⁹Waak muat tur bat no pinapalim tano Halhaliana Tanuo. ²⁰Waak muat malok ise ira nianga gar na tangesot. ²¹Iesen, i tahut bia muat na walar kilam ira linge bakut. Muat na palim kawase ira bilai. ²²Muat na tur talur ira mangana sakena bakut.

²³Metal sasaring bia God at nong i tar ra malum ta dahat, na bul hasisingen ira numuat nilon bakut bia na halhaal talur ira sakena taar ta ira gamgamatien. Ma metal sasaring mah bia na balaure ira tanua muat, ira bala muat, ma ira palatamai muat waing taie tiga nong na tale wara kilkilam muat bia a mon sakena ta muat tano pakana bung bia no udahat Watong Jisas Kraiis na hanuat. ²⁴God nong i tau muat na gil kaiken kanong i la gilgil haruatne ira uno nianga.

- ²⁵Bar hinsaka metal, na tahut bia muat na sasaring wara gaie metal.
- ²⁶Muat na haatne leh ira hinsaka dahat ta Krai ma muat na gawane leh diet ma ra tahut na magingin. ²⁷Iau tange hadadas ta muat tano hinsana ra Watong bia muat na was iakan ra pakpakat ta ira hinsaka dahat bakut.
- ²⁸No harmarsai tano udahat Watong Jisas Krai na kis ta muat.